

# Jahresbricht vom Tanze 2007

D'Tanzlüt hei 35 Mal probet u derzue si mier 6 Mal öffentlech ufträtte.

Scho am 5. Januar si ds Vreni Wiedmer, Silvia Bühlmann, Brigitta Grünig u ds Vreni Bühlmann a ds erschte vo vierne Tanzleitertanze nach Riggisberg. Dert si sy wieder flissig ga nöii Tänz lehre.

Am Wochenänd vom 13.u 14. Januar si üser Tanzfroue i z'Gwatt ga schnuppere u lehre, was i dr Voukstanzwäud Nöis isch usecho u was si de chöi dr Gruppe witergäh. Natürlech si di Tänzerinne du ou gspannt gsi, wie das im Singe so zu u här geht, u us däm Grund hei si ou dert äs Bsüechli gmacht.

Am 16. März hei 5 Tanzfroue z'Gerzensee a dr DV vor Trachtevereinigung Landesteil Mittelland teilgnoh, um di nöischte Informatione z'vernäh.

Im Frühlig si während drüne Male äs paari vor Tanzgruppe a ds „Tanze für aui.“ Das isch vor Tanzleitig Mittelland düregführt worde.

Am Abe vom 30. März si mir Tanzfroue Richtig Kaufdorf ungerwägs gsi. Trachtegruppe Toffe het zum Regionauträfte iglade, wo das Jahr ir Aula vom Schuelhus z'Kaufdorf het stattgfunde.

Das zäme Tanze u Singe isch anders düre gführt worde aus anderi Jahr. Me het eifach frei chönne mittanze, wo me grad het Luscht gha. Es si keiner Tänz vortanzet worde. Z'Nüni hei mir natürlech ou gnosse, so isch es e ganz gmüetleche Abe gsi. Wies so üblech isch, schneits fasch immer we mir im Märze ungerwägs si. Bevor mir churz vor Mitternacht hei chönne heifahre, isch Schneewüsche agseit gsi.

Am 28. April hei mir bi wunderschönem Wätter a ds Hochzyt vor Daniela und Ueli Hadorn dörfe. A dä spezieu Alass si mir natürlech mit dä Sunntigstrachte gange. Mir hei bi dr wunderschöne Trouig dörfe derby si, wo äs Jodlerquartett unger angerem Ewigi Liebi gsunge het. Kurz bevor Trouig isch fertig gsi, si mir ganz lieslig us dr Chiuche use gange u si mit schöne Rose Spalier gstange. Nachdäm hei mir vor dr Chiuche d'„Susanpolka“ tanzet. Derzue hei üs d'Länderkapälle Ulmizberg musikalisch begleitet.

Später si mir bim Aperu uf em Burehof vo Hadorns z'Gurzele iglade gsy. Das richthautige Zvieribuffet hei mir so richtig gnosse. Zwüsche düre hei mir ou immer wieder eis tanzet. Z'Brütli Daniela het üs bim Tanze ungerstützt, das isch aber nid so eifach gsi, das länge Chleid isch är Daniela geng chli i wäg cho.

Am Abe isch vermuetlech bi aune Tanzfroue Schuehputze uf em Programm gschtande. Bim Tanze uf em lose Grien, hets rächt Stoub ufgwirblet.

Am 29. April hei d'Elisabeth Fankhauser, Vreni Brönnimann, Brigitta Grünig, Vreni Wiedmer u d' Silvia Bühlmann am Bott vo dr Bärnische Trachtevereinigung i dr Mooshalle z' Gümlige teilgnoh. Ä anonym verschickte Brief het im Vorfäld zur Versammlung für enorme Gesprächsstoff gsorget. Nach heftige Diskussione für d'Wahl vom Obmann u em Tanzleiterpaar hei d' Verfasser vo däm Brief ä empfindlechi Niederlag müesse istance. Dr viel kritisiert Obmann Heinz Wüthrich u z'agriffne Tanzleiterpaar Julia Brüllhardt u dr Res Marti si glanzvoll wiedergwählt worde.

Am feschtliche Tanzabe am 19. Mai im Casino z' Bärn hei z' Vreni Widmer, Kathrin Peter, Kathrin Hirschi, Brigitta Grünig u d' Lydia Fahrni teilgnoh.

Theres Rothacher het dr 50. Geburi dörfe fiire. Zu däm runde Geburtstag si mier Tanzfroue am 26. Juni iglade gsi. Nach em tanze ir Turnhalle z' Burgistein si mier zumene feine Znüni bir Theres iglade worde.

Tanzprob vom 3. September het im Heim vor Silvia Bühlmann z' Schwarzeburg stattgfunde. Wäge intensivem Rägewätter hei Tanzfroue das abglagne Hüsli fasch nid gfunde. Dr Schangnouer hei sy du flissig um z' Chemine ume güebt.

Z' Tanzleiterträffe hei z' Vreni Wiedmer u d' Brigitta Grünig am 28. Oktober z' Gümlige bsuecht. Mir scheztes sehr, dass sie geng di Zyt näh, für nöii Tänz gah z' lehre. Merci viu mau.